



Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

08 Juillet 2016 ~
(03 Shawwal 1437 AH)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite cause lor le sujet « **Après Eid & Renforcir Bane Liens de Parenté & de Fraternité »:**

APRÈS EID & RENFORCIR BANE LIENS DE PARENTÉ & DE FRATERNITÉ

Nous pé vive dans ene lémonde kot bane liens de parenté, bane liens entre bane voisins et bane liens de fraternité pé affaiblir de jour en jour. Li triste pou constater ki bane rencontres entre frères et frères, sœurs et sœurs, voisins et voisins etc. pé vine de plus en plus rares. Parfois bane zenfants même pas gagne lé temps prend bane nouvelles de zot bane grands dimounes et bane ki pli âgé ki zot, azordi zour personne pas conne so voisins, pas ena sa quantité de bane échanges entre bane frères dans l'Islam. Heureusement, par l'immense grâce d'Allah (swt), après ene mois de *Roza* (carême) kot nous fine prend ene bain spirituelle, nous fine sacrifié tous pour la cause d'Allah pour gagne Allah (swt) même comme nous récompense. C'est ene très grand récompense de la part d'Allah pour ene croyant pour sa mois de carême là et après ene mois *Roza*, la fête *Eid-ul-Fitr* vine alor ene occasion pou li pou ki li répare bane erreurs ki li ti commette avant.

En vérité, la journée de Eid commencé avec *Salaat* (*Namaz*, la prière) dans *Masjid*. Bane *Momin* (*Momeneen*, croyants) alle en famille dans *Masjid* pou accomplir avec contentement dans lé cœur zot *Salât-ul-Eid* (*Namaz Eid*). *Salât-ul-Eid* c'est ene moment de rassemblement de tous bane croyants, hommes et femmes, jeunes et vieux, riches et pauvres. D'ailleurs, sa *Namaz* dans *Masjid* là li fortement recommandé aussi pour bane madames d'après *Sounnah*. D'après

Oummé Atiyyah (ra) : « *Le Prophète (saws) ti pé ordonne nous pou amène pour le Fitr (Eid-ul-Fitr) et Adha (Eid-ul-Adha) tous bane madames âgées, bane jeunes filles, bane madames ki dans zot règles, et bane jeunes vierges, mais bane madames ki ti dans zot règles ti pé écarte zot de Salaat et ti pé assister à bane biens et à bane invocations de bane musulmans.* » (Boukhari & Mouslim).

C'est dans la zoie et le bonheur ki nous tous nous retrouve nous kan *Namaz* fini kot sakaine serre zot camarades, zot faire l'accolade. Sa c'est bane moments d'émotions intenses kot bane liens sans aucaine doute resserré. Bane embrassades et accolades zot aussi symboles de pardon kot nous oublié nous bane ti disputes, nous délaisse tout conflit ou différends ki ti ena entre nous. Nous resserre vraiment fraternité ki unir nous, couma l'islam recommande nous.

Ensuite vine le moment pou rende visite à bane familles, bane proches, couma tradition de nous bane ancêtres ki ti pieux fine montrer nous. En effet, d'après ene Hadith rapporté par bane Imams Boukhari et Mouslim, ene jour de Eid, Hazrat Abou Bakr (ra) fine alle rende visite le Saint Prophète (saws) et fine trouve deux ti filles ki ti pé chanter. Li fine en colère, mais le Prophète (saws) fine réponde li pou laisse bane là tranquille parski ti ene jour de réjouissance. Li fine dire li :

« *Ô Abou Bakr, sak peuple ena so bane jours de fêtes, et azordi c'est nous fête.* »

C'est aussi l'occasion pou montrer à nous bane zenfants ki c'est effectivement nous fête, ki li permette ki nous célébrer nous fête dans la joie, pou échange bane cado, pour témoigne nous l'affection à bane ki proche de nous. Li également permette pou nous pou mette bane zoli linze neufs, pou décore la caze, sans toutefois faire bane exagérations afin pou bien recevoir bane familles, bane voisins et bane camarades. Le fait pou prend ene bon manzé ou ene boire (sans l'alcol bien sûr) ensam li certainement ene moment de contentement et de rapprochement et kot ena bane échanges dans ene l'ambiance de fraternité. Sa jour là, bane souhaits (de Eid) pleuvoir de partout.

« *Eid Sa'eed kullu Am wa Antum bi Khayr.* »

Nous envoie bane sms, bane emails, bane cartes de souhaits, donne bane coups de téléphone pour souhaite zot tous ene Eid Moubarak. Tous bane moyens bons pour renforcer nous bane liens de parenté et de fraternité même à bane ki loin. Nous retrouve nous dans la zoie, la bonté, bane bénédictions, et dans ene retour sincère à la religion d'Allah (swt). Sa jour de bonheur là faire nous pense à nous séjour dans l'au-delà (*Insha-Allah*) kot tous bane éléments réunis pour faire nous passe bane moments agréable : bane visite, la zoie, bane partage de bane bon manzé, bane bons gato et le simple fait pou assizer à table en famille aussi.

Allah dire dans Quran Shareef :

« En récompense de saki zot ti pé faire, manzé et boire avec plaisir (...). Bane ki ena la foi, et ki zot descendants fine suive zot dans la foi, Nous pou mette zot descendants ensam avec zot. Nous pas pou diminuer récompense zot actions en aucaine façon. Sak dimoune, li responsable pou saki li fine amassé. » (At-Tûr 52: 20-22)

Sa jour là donne nous non seulement le droit pou réjouir, mais li donne nous aussi bocou matière à réflexion. Si en sa jour de fête là nous réuni, nous renforci nous bane liens, nous oublier nous bane différends, alors kifaire nous reste séparer et dés-uni tout le reste de l'année ? Kifaire tant de disputes, tant de bagarres entre nous ? Ô bane frères et sœurs dans l'Islam, anou faire bane zéffore pou faire ki Eid vine ene moyen pour unir la famille, aussi bien ki l'ensemble de la communauté musulmane pour toujours ! Et nous bizin faire bane zéffore afin pou étendre bane bénédictions de Eid lor nous même après Eid aussi en manifestant en nous-mêmes bane même culture pieuse ki Ramadhan fine enseigne nous pou cultiver dans nous la vie de tous les jours.

Ki Allah faire ki sak zour de nous la vie vine ene jour de Eid kot la paix et la fraternité islamique régner et ki bane conflits et bane tueries et massacres absents. Ki Allah sauve nous l'âmes ainsi ki l'âmes de tous bane croyants. *Ameen. Summa Ameen, Ya Rabbal Aalamine.*